

Concierto Dominical Donny Lacle:

Cu un variacion di musica alegre y un sorpresa chikito



Diadomingo, dia 28 di juni 2015, Fundacion pa Talento Musical "Donny Lacle" a presenta un bi-ahia mas su Concierto Dominical den "The French Steak House" di Manchebo Beach Resort & Spa. Manera semper e concierto aki a tuma lugha di 11.0'or di main-
te te 01.00'or di merdia.

E concierto a cuminsa cu un bunita presentacion di e coro femenino Cantare, miembro di e Asociacion

Coral Ars Nova. Compañia pa Mayra Kock-Garrido riba piano y Edwin Kock riba guitarra, e coro a laga e publico encanta cu presentacion di nan canticanan: "One nota samba", "Aruba Romantica", "Papa loves Mambo" y "Pan Cayente". E siguiente grupo New Generation Steel Junior, bou direccion di Ricky Figaroa, ta consisti di musiconan den edad di 8- 15año. Ademas di musica di carnaval nan a toca un variacion di cantica, manera Neba, Guantanamera. Y

un grupo di mucha muhe so a toca Thinking out loud. Publico a keda encanta y sorprendi pa nan habilidad calidad musical riba e steelpannan. Ata, sorpresa! Un grupo di chikitin, yen di briyo, y tocando maraca y wiri a canta Solo lo no Briya compañía pa e steelband. Especialmente e yoncuman chikito bisti cu sombre di cabana y cantando pa dos a gana curason di un y tur. E grupo aki di 5 mucha aki un biaha pa siman ta haya les di Linda, ruman di Ricky. Nan ta canta, pinta, balia y expresa e canticanan cu nan ta scucha y ora nan yega edad di 8 año, mayoria di nan ta bay toca steelpan cerca Ricky. Nunca nos no a mira tanto hende saca potret manera na e momento aki.

Durante un intermedio cortico e caha di glas a pasa rond y tur hende por a haci un donacion cu na november por yuda algun estudiante cu talento pa musica cu nan estudio financieramente.

E di tres presentacion tabata na encargo di Chris Kross



y Susjaira Kerpens. Den un forma casi profesional riba su guitarra baho Chris acompaña Susjaira kende cu su stem angelical a canta: Bikina, Is n't she lovely, Happy, Awe tardi, September, y Cunucu di seit. Nan a haya un aplauso bon mereci di e publico. Pa nos di Concierto Dominical y Chris e presentacion aki tabata manera un despedida (temporal?), pa motibo cu Chris pronto ta bay sigui su estudio na un conservatorio na Merca. Na nomber di tur e bishitantenan di Manchebo nos ta desea Chris hopi exito den su bida nobo di estudiante.

Pa finalisa nos concierto a presenta e Mini Mariachi Vicente y Rosa y como invitado e trompetista Leonardo. Vi-

cente y Rosa ta integrante di Mariachi Lirios del Campo. Pero tin ora, manera diadomingo tabata e caso, nan a presenta como Mini Mariachi Vicente y Rosa. Vicente a toca guitarra y tambe sinfonia di boca y Rosa a toca guitaron cu ta e instrumento mas grandi cu barica, Y aunke Mini, nan a laga esunnan presente disfruta di canticanan manera Celoso, Nos ta sali paranda, Gaviota Traidora, Machi y den bos di Persey Jeandor: El Rey. Comision organizado ta yama danki na tur e musiconan cu a coopera y tambe na esunnan cu a bin presencia e concierto. E siguiente concierto no ta tuma lugha na juli sino na fin di augustus 2015. □

